

INUIT ATAQATIGIIT

INATSISARTUNI



Nuuk, 21. januar 2014

Inatsisartut Suleriaasianni § 37 naapertorlugu Naalakkersuisunut imaattunik apeqquteqar-punga.

(Inatsisartuni ilaasortaq Naaja H. Nathanielsen & Ane Hansen, Inuit Ataqatigiit)

Apeqqutit:

1.

Suli paaserusuttuarsinnarparput aalajangiisarnerni biologit siunnersuisarnerinit paasissutissiissutigineqartartut atuisullu ilisimasaat¹ Naalakkersuisut piviusumik qanoq atortinniarneraat. Ulloq 13. september 2013 ammaanermi oqalugiaammini Naalakkersuisut Siulittaasuut oqarpoq "atuisut ilisimasaat bilogit siunnersuine-rattulli naleqartigaluni" atortinneqassasoq. Kisiannili § 37 naapertorlugu apeqqummut nr. 257-2013-imut akissummi d. 16. januar 2014-imeersumi Siulittaasoq oqarpoq atuisut ilisimasaannik ilanngutititsinermut atatillugu siusinnerusukkut pisarsimasunit allanngortitsisoqangaassanngitsoq. Taamaattorli aalisartut ilisimasaat "ilanngullugit" suliarineqartassasut. Oqaaseq "ilanngullugit" Naalakkersuisut qanoq isumaqartippaat? Akissummi unnersuussutigineqarpoq oqaaseq "suleriaatsimmi eqqunneqaqqaartariaqarmata", tamannalugooq pillugu massakut "naleqqiussusooqartarnissaanik oqalussalluni tunngavissaqanngilaq." Tamanna imatut paasisariaqarpa suliamiit suliamut allanngorartumik atuisut ilisimasaannik biologillu siunnersuinerannik naleqqiussisoqartoqartalerumaartoq?

2.

Naalakkersuisut qinnuigissavagut aalisarnermi ingerlatsisut ataatsikkut aalisarsinnaanermut tulaassuivinnullu aningaasaliissuteqarsinnaanermut mattusnaanissaannik piumasaqarnikkut ammasumik sunniuteqarluartumillu unamilleqatigiittoqarnissaa qulakkeerreqassasumik tunngavilersuutitut atugartik itisileqqullugu.² Tamanna ammasumik sunniuteqarluartumillu unamilleqatigiitto-qarnissaanik killiliinertut aamma isigineqarsinnaanngila?

3.

Naalakkersuisut allapput "aaqqissuussineq massakut atuuttoq ima ineriartorsi-mavoq ullumikkut pissutsit imaalersimallutik nunatsinni aalisarnermi ingerlatse-qatigiiffiit aalisarnerup iluani niuernerme annertuumik aalajangiisuusumillu inissi-simalersimallutik, ingerlatseqatigiiffiit taakku nunami tunitsivinnik piginnittuu-nermik saniatigut aalisarsinnaatitaanernik annertuumik pigisaqarnerat tunngavi-galugu." Ingerlatseqatigiiffiinuku kikkorpiaat Naalakkersuisut unnersuussutigi-gaat? Inuussutissarsiutip aalajangersimasup iluani piginnittuunerup eqiterneqar-pallaarsinnaaneranik pinngitsoortitsiniarneq imaluunniit annertuallaartumik aalajangiisuuallaartumillu inissisimatsaaliuinissaq Naalakkersuisut inuussutis-sarsiornikkut ingerlatsinermi isumatut tunngavigilersimanerpaat, uffa inatsisit malinneqaraluartut? Ingerlatsisoq nunatsinni niuernerme annertuallaartumik aala-jangiisuuallaartumillu inissisimasutut isigineqalissappat tamatumingga aalajan-giinerme suut tunngavittut atorreqassappat? Naalakkersuisut pilersaarpat isuma-

¹ Takuuk aalisarnermut inatsisissatut siunnersuummi § 1, imm. 2

² Takuuk akissuteqaat nr. 3 16. januar 2014-imeersoq

liortaaseq taama ittoq inuussutissarsiutinik allanik ingerlatsinermut tuniluutsin-
niarlugu?

4.

Apeqqutit sisamaannut akissut ersernerluppoq. Inatsisissatut siunnersuummi oqaaseqaatiniluunniit allassimasoqanngimmat paragraaffip aalisartutut inuussutissarsiuteqartuunissamik piumasaqaatitallip (kummersualinnut paragraaffip) eqquteqqinneqarnissaa taamaallaat siunissami qinnuteqartartussanut atortuutinneqassasoq ilumoornerarneqarsinnaava Naalakkersuisut inatsisissatut siunnersuutaat kukkuneqartoq? Inuinukua kikkut, aammaana aqqissuussineq qanoq ittoq, apeqqutit sisamaannut akissummi unnersuussutigineqartut Naalakkersuisut isumaanniittut?

5.

Naalakkersuisunut erseqqissaqqussavarput inatsisissatut siunnersuutip immikkoortui sorliit "inatsisiliortut nalinginnaasumik taarsiissutitaqanngitsumik inuussutissarsiornermi pissutsit pillugit malittarisassiorsinnaanerannut killiliussat iluanni" timitalerneqassanganneqarnersut. Kummersualinnut paragraaffip eqquteqqinneqarnissaa kisiat pineqarpa imaluunniit tulaassuivinnik akuersissutinillu ullumikkut piginnittuusut aamma pineqarpat?

6.

Naalakkersuisut allapput inuit aalisariutinik ingerlataqartut "ilalerlutik" tulaassuiveqarnermik siunissami ingerlataqarsinnaanermut mattussaasalissanngitsut. Naalakkersuisunut itisileqqussavarput namminneq inatsisiliaminni aalajangersak-
kat suut taamatut oqaaseqaateqarnissamut tunngaviliisitsinersut.

7.

Aalisarnermut inatsit kinguartinneqassasoq qanga kimillu aalajangiiffigineqarpa? Tamanna piva qaammatip matuma naalernerani Aalisarnermut Naalakkersuisunngortinneqaruni kinguartitsiniarluni Inatsisartuni ilaasortap Finn Karlsenip tusagassiorfinnut oqarnera sioqqullugu kingoqqulluguluunniit?

8.

Aalisarnermut nutaamik inatsisissap sinaakkutai pillugit Naalakkersuisut aalisarnermilu kattuffiit isumaqatigiillissagaluarpata – taava tamanna Siumup Inatsisartuni gruppiata akerlileeratarsinnaaneraningarnit pingaernerutinneqassava? Taamatut aperisariaqarnermut pissutaavoq Naalakkersuisooqatigiinni ilaasortaasut arlallit maanna oqarmata naatsorsuutigineqassasoq Siumup Inatsisartuni gruppiata aalajangertagaasa inatsisiliortarnerni timitalerneqartarnissaat.

Tunngavilersuut:

Aalisarnermut inatsisitaassaq pillugu IA-mit apeqquterput (§ 37-mut akissut, 2013/257) kiisami den 16. januar akineqarpoq. Ajoraluartumilli arlalitsigut ersernerluttumik qar-supittumillu akisoqarpoq. Aalisarnermut inatsisissatut siunnersuutip imai Aleqa Hammondimit, Aalisarnermut Naalakkersuisuugallartumit, akissummi tassani illersorneqarput. Ullorli taannarpiaq akisoqartoq Aalisarnermut Naalakkersuisunngortussaap Finn Karlsen oqarpoq isornartorsiorneqarnera pissutigalugu inatsisissatut siunnersuut kinguartinniassamaarini. Taamalu Naalakkersuisooqatigiit nalornisoortitsileqqippat aalisarnermut tamatumalu siunissami ineriartortinneqarnissaanut tunngatillugu qanorpiaq isumaqarnerminnik.